

Kulturna raznolikost je lijek protiv podjela



Kulturnu raznolikost ne treba izjednačavati s društvenim i političkim podjelama, rekao je visoki predstavnik Valentin Inzko u obraćanju sudionicima konferencije koju je organizirao Evropski pokret BiH na Univerzitetu Burch u Sarajevu.

“Raznolikost je suprotna podjeli”, rekao je visoki predstavnik. “To treba shvatiti jer predstavlja ključ za vraćanje Bosne i Hercegovine na evropski put. Raznolikost, a ne podjela, to je ono što je normalno u Evropi.”

Visoki predstavnik je naveo presudu Evropskog suda u predmetu Sejdić-Finci kao “suštinsku i principijelnu odluku koja će ići u prilog svim ljudima u Bosni i Hercegovini, kada bude provedena.”

Visoki predstavnik je rekao da je ovo „jasna i čvrsta osnova na kojoj je moguće štititi i promovirati raznolikost koja obogaćuje i jača svako uspješno društvo.”

„Predugo je kulturološko nasljeđe smatrano neizbježnim uzrokom podjela u okviru bosanskohercegovačkog društva“, rekao je visoki predstavnik. „Nedovoljno često se kritički osvrćemo na one ljude koji plasiraju ovaj argument kao da se radi o istini koja je posve očigledna. To je površan, neiskren i pogrešan argument i odgovara onima koji bi bili uspješniji u zemlji koja je doživjela neuspjeh nego u zemlji koja je uspjela.“

Visoki predstavnik je rekao da su „građanske vrijednosti koje su nestale u drugim dijelovima Evrope – gostoljubivost, susjedska solidarnost, „merhametluk“ – ovdje preživjele. Preživjele su uprkos velikim naporima jednoumnika i šovinista da ih izbrišu. One su preživjele *zahvaljujući* bogatom i raznolikom kulturnom nasljeđu ove zemlje – a ne *uprkos* njemu.“

„Kulturna raznolikost je lijek protiv socijalnih i političkih podjela“, rekao je visoki predstavnik. „Ona je ključni element na dugačkom putu ove zemlje ka oporavku.“

Cijeli tekst obraćanja visokog predstavnika možete pročitati na [sljedećem linku](#).